

## Script of Evening Gojri News Bulletin 27 November 2025 at 1700 Hrs

ایویننگ گو جری نیوز بلیٹن مورخہ 27 نومبر 2025

\*\*\*\*\*

یوہ آکا شوانی جموں ہے محبوب سلطانی تے محمد اکرم چودھری تیں خبر سنو۔ پہلاں خاص خاص خبر۔

\*\*\*\*\*

\*1. وزیر اعظم نریندرمودی نے کہیو ہے جے بھارتی خلائی شعبو عالمی سرمایہ کاراں غی توجہ غو مرکز بن رہیو ہے ، اُنہاں نے ویڈیو کانفرنسنگ غے ذریعے سکائی روٹ انفنٹی کیمپس غو افتتاح کیو ہے ۔

\*2. جماعت اسلامی ور کا روئی کرتانواں پولیس نے کشمیر اندر بکھ بکھ جگہاں ور چھاپہ ماری کی ہے ۔

\*3. پولیس نے جموں مانہ دبشت گردی سنگ جڑایا اک نوجوان گرفتار کیو ہے ۔

\*4. جل شکتی غا وزیر جاوید احمد رانا نے مینڈھر مانہ نواں شروع کیا گیا ترقیاتی پروجیکٹ غا نفاذ غو جائزو لیو ہے ۔

\*5. تے جموں خطہ مانہ ٹھنڈ غی شدت مانہ بابدو ہو رہیو ہے تے کئی جگہاں ور رات غا درجہ حرارت مانہ خاصی کمی دیکھی جا رہی ہے ۔

\*\*\*\*\*

خبراں غی تفصیل نال پہلاں محبوب سلطانی۔

### PM Skyroot Campus

وزیر اعظم نریندرمودی نے کہیو ہے جے بھارت غو خلائی شعبو عالمی سرمایہ کاراں واسطے اک توجہ غو مرکز بنتو جا رہیو ہے ۔ اسکائی روٹ غا انفنٹی کیمپس غا افتتاح غا موقع ور ویڈیو کانفرنسنگ غے ذریعے خطاب کرتاں واں جناب مودی نے کہیو ہے حکومت نے بھارت غا خلائی شعبہ مانہ کئی تاریخی بدلائو کیا ہیں۔ اُنہاں نے کہیو ہے حکومت نے نجی ایجاد واسطے خلائی شعبہ مانہ کھول دتو ہے ، جس سنگ اسٹارٹ اپس تے صنعتاں مانہ ملک غا سائنسی نظام غے نال مل غے کم کرن غو موقع ملے گو ۔ جناب مودی نے اس گل مانہ اُجاگر کرتانواں کہیو ہے آن آلا بہراں مانہ عالمی خلائی معیشت کئی گنا بدھے گی تے اس سنگ ملک غا نوجواناں واسطے بے شمار نواں موقع پیدا ویں گا ۔ اُنہاں نے کہیو۔۔ بانٹ۔۔

\*\*\*\*\*

## Kashmir Raids

پولیس نے اج وادی کشمیر غی بکھ بکھ جگہاں ور ممنوعہ تنظیم جماعت اسلامی غے خلاف کاروانی غے تحت چھاپا ماری کی ہے۔ اس سلسلہ مانہ تلاشی غی کا روانی انت ناگ، پلوامہ، بڈگام، کلگام تے کپواڑہ مانہ کی گئی ہیں۔ یاہ کاروانی جماعت اسلامی سنگ جڑیا واہ تے ان غا ساتھیان غی رہا نش تے دوجی جگہاں ور کی گئی ہے، جہیڑی کہ دبشت گردی غا نظام تے اس نانہ مدد فراہم کرن آلا ڈھانچاں نانہ ختم کرن غی جاری کوششاں غو حصو تھی۔ اس بارے ملی خفیہ جانکاری توں پتو چلیو تھو جے جماعت اسلامی غا کچ ممبر ملک دشمن سرگرمیاں مانہ ملوٹ ہیں، چھا پے ماری غے دوران لبو وہ برقی سامان، دستا ویزات تے ادبیات نانہ ضبط کیو گیو، تانجے تفصیلی جانچ کی جا سکے۔

## Terror Arrest

پولیس نے اج اک 19 سال غا نوجوان نانہ مشتبہ دبشت گردانہ سرگرمیاں غا سلسلہ مانہ گرفتار کیو ہے تے اس غے کولوں برآمد کیا گیا جدیدیاتی سامان نانہ وی ضبط کیو ہے۔ مہارا آکاشوانی جموں غا نمائندہ نے خبر ٹوری ہے جے پولیس غا ترجمان نے دسیو ہے جے ملزم غو تعلق بنیادی طور ور ریاسی توں ہے تے اس ویلے وہ بٹھنڈی علاقہ مانہ رہ رہیو ہے۔ منیو جا رہیو ہے جے یوہ شخص دبشت گردی متعلق سرگرمیاں مانہ ملوٹ ہو سکے۔ اس ضمن مانہ پولیس نے بھارتی نیائے سنہیتا غی سیکشن 113 غے تحت پولیس سٹیشن بابو مانہ اک معاملو درج کیو ہے۔ پولیس نے دسیو ہے جے شروعاتی تحقیقات مانہ ملزم نے دسیو ہے جے وہ آن لائن شدت پسندی غی طرف مائل کیو جا رہیو تھو تے وہ دبشت گرد کاروانی کرن غی منصوبہ بندی کر رہیو تھو۔ حکام نے دسیو ہے جے مشتبہ شخص مو بائل فون غے ذریعے پاکستان تے دیگر ممالک مانہ موجود کجھ نمبران سنگ رابطہ مانہ تھو، ملزم کولوں ضبط کیا گیا جدیدیاتی سامان غی جانچ کی جا رہی ہے تانجے تحقیقات نانہ آگے بدھیا جا سکے۔

## Modern Looms

بٹھ کھڈی تے دستکاری محکمہ کشمیر نے اپنا قالین بُن گا تربیتی مرکز اسطے کیپکس 26/2025 غے تحت پہلا مرحلہ مانہ 25 جدید سٹیل لومز یعنی قالین بُن غی مشیناں نانہ خریدیو ہے۔ اس تیں علا وہ کپڑا سازی غی وزارت نے مرکزی اُون ترقیات بورڈ غے سکیم وول پروسسنگ غے تحت اس سال 100 مزید قالین بُن آلی مشیناں نانہ منظوری دتی ہے جس سنگ بُن آلاں نانہ خاصو فائدو پُجے گو۔ محکمہ غا ترجمان نے اپنا اک بیان مانہ دسیو ہے جے نوی قالین بُن آلی مشیناں نانہ اس طرح تیار کیو گیو ہے جن مانہ تربیت حاصل کرن آلاں واسطے بیسن غی جگہ تے ٹنگ رکھن غی جگہ غو خاص خیال رکھیو گیو ہے تانجے صحت بارے مسائل پیدا نہ ویں۔

## UIDAI

بھارت غی منفرد شناخت بارے اتھارٹی (یوآئی ڈی اے آئی) نے آدھار ڈیٹا بیس نانہ درست تے قابل اعتماد رکھن واسطے ملک گیر صفائی مہم غے تحت 2 کروڑ توں متا فوت ہوا افراد غا آدھار نمبر نانہ غیر فعال کر دتو ہے۔ اطلاعات تے برقیاتی ٹیکنالوجی غی وزارت نے دسیو ہے جے یوآئی ڈی اے آئی نے یوہ ڈیٹو بھارت غا رجسٹرار

جنرل ریاستاں تے مرکزی زیر انتظام علاقان توں حاصل کی و ہے ۔ وزارت نے مزید کہیو ہے جے کسی وی آدھار نمبر نانہہ کدے وی دوبا رہ دو جا فرد نانہہ نہیں دتو جاتو۔ اس بارے وزارت نے مزید دسیو ہے جے فوت ہون آلا شخص غو آدھار نمبر غیر فعال کرنو ضروری وے تانجے شناخت غی ممکنہ چوری ، دھوکہ دہی یاہ غیر معجاز استعمال نانہہ روکیو جا سکے۔

\*\*\*\*\*

مزید خبراں نال محمد اکرم چودھری۔ ور اُس تیں پہلاں یوہ پیغام۔(یہ خبر تم آکاشوانی جموں تیں سن رہیا ہیں، تے یہ خبر مہاری ویب سائٹ نیوز آن ائیر ڈاٹ گوو ڈاٹ ان ور وی دستیاب ہیں، اس تیں یہ خبر مہاری موبائل ایپ تے ڈی ٹی ایچ وروی دستیاب ہیں)

### Rana Mankote

منکوٹ ہلاک مانہہ 80 کروڑ روپیاں غا ترقیاتی کماں غا سنگ بنیاد رکھن غے اک تیہاڑے بعد جل شکتی غا وزیر جا وید احمد رانا نے اج مینڈھر مانہہ اک جامع جائزہ میٹنگ بلائی، تانجے عمل آوری غو نقشو تے پورا ضلع مانہہ چل رہیا کماں غی پیش رفت غو جائزو لیو جا سکے۔ اجلاس غی صدارت کرتاں واں وزیر موصوف نے اس گل ور زور دتو کہ بڑا پیمانہ ور کم شروع کیا گیا ہیں تے مذکورہ کم سرحدی علاقہ غی ترقی غی نشاندہی کریں۔ انہاں نے مزید کہیو کہ تمام محکمہ قریبی تال میل سنگ کم کریں تانجے منظور شدہ کماں نانہہ ویلے سر تے شفافیت نانہہ یقینی بنایو جا سکے تے کسے وی قسم غی رکاوٹ نہ آوے تانجے عوام واسطے ترقی ہو سکے۔

\*\*\*\*\*

### Udhampur Musroom

مشروم غی کاشت اُدھم پور مانہہ لوکاں غی زندگیاں مانہہ بڑی تبدیلی لیا رہی ہے تے بے روزگار نوجوانان واسطے کمائی غو منافع بخش تے قابل اعتماد ذریعو بنتو جا رہیو ہے ۔ اور علاقہ مانہہ ذریعی انقلاب لیان مانہہ اہم کردار ادا کر رہی ہے ۔ صحیح تربیت تے رہنمائی سنگ مشروم غی کاشت پورا سال کی جا سکے۔ جس سنگ کساتاں نانہہ لگاتار آمدنی حاصل ہوتی رہ۔ اس ضمن مانہہ اُدھم پور غا ٹکری علاقہ توں تعلق رکھن آلا جو گیندر پور جھپڑا مشروم غی کاشت کرے تے کھیتی باڑی بارے مجموعی ترقیاتی پروگرام غے تحت قائم مشروم یونٹ غے ذریعے اپنی زندگی مانہہ نمایاں تبدیلی دیکھی ہے ۔ اس بارے آکاشوانی نیوز سنگ گل کرتاں واں انہاں نے کہیو۔۔ بانٹ۔۔ اُنکاں مشروم غی کاشت بارے مزید جانکاری دیتانواں مشروم ترقیات افسر اُدھم پور ونود گپتا غو کہنو تھو۔۔۔ بانٹ۔۔

\*\*\*\*\*

### Reasi Mushroom

ضلع ریاسی مانہہ کٹڑا غے قریب سول گراں مانہہ ذراعت اک خاموش تبدیلی غو مشاہدو کر رہی ہے تے ضلع غو اک کسان راکیش کمار کامیابی غی روشن مثال بن غے اُبھر رہیو ہے ۔ ریاسی تیں تعلق رکھن آلا راکیش نے مک تے کنک غی روایتی کاشتکاری تیں تجارتی مشروم غی در رکھ کیو ہے ۔ اس طرح مذکورہ کسان روزانہ 70 تیں 80 کلو گرام تازہ مشروم بیچ غے 5 ہزار تیں 6 ہزار ہر دن کمار رہیو ہے ۔ کئی بہراں تیں راکیش

نے بے موسمی صورتحال غے مد نظر روایتی فصلان تیں فائدو چان غی کوشش کی تے اک چنگا متبادل غی لوڑ مانہہ راکیش نے مشروم غی کاشت نانہہ اپنايو جس مانہہ زمین غی کھٹ ضرورت وے لیکن فائدو زیادہہ را کیش کمار نے آکاشوانی غا خبراں آلا شعبہ سنگ گل کرتانواں اس طرح کہیو۔۔ بانٹ۔۔ مشروم غی کاشت بارے مزید جانکاری دیتانواں کھیتی باڑی بارے سب ڈویژنل افسر کٹڑا نے اس طرح کہیو۔۔ بانٹ۔۔

\*\*\*\*\*

## Accident

جموں پٹھانکوٹ قومی شاہراہ ور آج اک گڈی فلائی اور پُل غا پلر سنگ ٹکرا گئی، جس غا نتیجہ مانہہ کھٹ وکھٹ 13 مسافر زخمی ہو گیا ہیں۔ حکام غے مطابق یوہ حادثو بڑہ براہمنہ غے نیڑے اُس ویلے پیش آیو جد جموں تیں کٹھوعہ جان آلی بس تیز رفتاری سنگ چل رہی تھی تے ڈرائیور غا قابو تیں باہر ہو غے زیر تعمیر فلائی اور غا پلر سنگ جا ٹکرائی۔ زخمیاں نانہہ تاواں ہی علاج معالجہ واسطے قریبی ہسپتال پجایو گیو ہے ۔

\*\*\*\*\*

## Weather

سخت سردی غی لہر نے بدھوار غی رات جموں خطہ غا کئی علاقان ور اپنی گرفت مضبوط کر لی، تے زیادہ تر مقامات ور رات غا درجہ حرارت مانہہ تیزی سنگ کمی درج کی گئی ہے۔ آکاشوانی جموں غا نامہ نگار نے خبر ثوری ہے جے جموں خطہ غا میدانی علاقان مانہہ درجہ حرارت منفی تیں اوپر رہیو ہے ۔ اس طرح جموں مانہہ درجہ حرارت 8 اشاریہ 7 ڈگری سلیس، کٹڑا مانہہ 8 اشاریہ 5 ڈگری سلیس، کٹھوعہ مانہہ 8 اشاریہ 2 ڈگری سلیس جد کہ جموں ہوائی اڈہ ور 10 اشاریہ 1 ڈگری درجہ حرارت رہیو ۔ اسے طرح بالائی علاقہ بانہال مانہہ منفی 1 اشاریہ 5 ڈگری سلیس، بہدرواہ مانہہ صفر اشاریہ 4 ڈگری سلیس، بٹوت مانہہ 4 اشاریہ صفر، رام بن مانہہ 4 اشاریہ 1 ڈگری سلیس، را جو ری مانہہ 2 اشاریہ صفر ڈگری ، ریاسی مانہہ 6 اشاریہ 9 ڈگری سلیس، سانبہ مانہہ 6 اشاریہ 9 ڈگری سلیس جد کہ اڈھم پور مانہہ 4 اشاریہ 6 ڈگری سلیس درجہ حرارت درج کیو گیو ہے ۔

\*\*\*\*\*

اس غے نال ہی خبراں غو یوہ بلیٹن ختم ہوؤ۔